

臨

縣

志

臨縣志卷十四

試署臨縣知事古黔胡宗虞監脩

山西大學校文科學長晉城郭象升審定

沿革考第一

志詳沿革所以徵建置而正疆域也郭衷恒有言宇宙之山川不改古今之稱謂各殊後世考地亦必以山川爲準望臨僻處山陬商周以前建置不聞自趙韓魏三分晉地秦趙相攻始有藺臯狼等名由今考之二地當在縣境東南離石西北均無古蹟可徵前漢置臨水縣屬并州西河郡說者謂因陵水得名延及後漢西河遷於離石而臨水已省魏晉齊周離石以西匈奴竊據百餘年不奉正朔自隋唐以來始隸中朝版籍惟析置遷改疆域攸殊舊志

於沿革未加考覈王顧齋先生新通志戴東原先生汾州志考古
今沿革最爲詳悉茲據二志徵之古籍以山川準地望輯爲沿革
考其歷代設置無徵不信者不敢妄逞臆說也

縣境於禹貢應屬冀州爾雅職方同

新通志禹貢冀州河行其西界乎雍冀之間南流爲西河爾雅

釋地兩河間曰冀州據西河東河

古黃河自大伾山南折而
北界冀兗之間爲東河而

言正義曰明東河之西西河之東南河之北是冀州之域也周
禮職方氏河內曰冀州正北曰并州馬融曰舜以冀州之北廣
大置并州鄭康成曰舜以冀州之北遠大分衛爲并

謹案戴氏汾州志梁岐考辨正梁即離石之呂梁山新通志
鄭氏分衛爲并蓋以禹貢恒衛旣從衛爲滹沱在太原以北

言分衛以北爲并州春秋時并北之地胥爲狄居呂梁則在太原之西臨又在呂梁之西少南濱西河爲邑應屬冀州然漢之西河郡屬并州臨水爲西河屬縣是不屬冀而屬并但其時草昧初開叢林澗谷巡省不到尙無地名可考

春秋之季爲晉地

春秋魯昭公元年晉平公十七年荀吳帥師敗狄於大鹵始擴地北至太原

謹案日知錄云霍山以北皆狄地自悼公後始開縣邑臨在霍山西北五百餘里晉悼公時其爲狄居無疑自平公敗狄擴地北至太原臨在太原之西少南其地當爲晉有藺臬狼臨水之名後此遂見於經傳

七國時爲趙地今縣南爲藺境東南爲臬狼境

史記周安王十六年趙韓魏三分晉地趙都邯鄲晉陽以西皆爲趙有魏武侯十五年敗趙北藺當趙成侯三年張守節云藺在石州趙之西北是也趙成侯二十二年趙疵與秦戰敗秦殺疵河西取我藺石趙武靈王十三年秦拔我藺虜將軍趙莊姓纂韓厥玄孫康仕趙食采於藺因氏焉後相如爲趙上卿汾州志臬狼即離石西北及臨縣之境史記秦本紀趙世家皆言周成王時趙之先曰孟增幸於王是爲宅臬狼宅臬狼者蓋因所居爲號戰國策智伯使人之趙請蔡臬琅之地趙襄子不與語轉字異亦曰郭狼趙武靈王召樓緩謀曰我先取藺郭狼智伯所請之蔡臬琅即武靈王所稱之藺郭狼藺字轉寫訛作蔡

臯郭語轉琅狼音同耳

謹案藺云趙北趙之北鄙也藺石藺臯狼並舉者是三縣連境足徵今縣在其轄內

漢置臨水縣隸西河郡屬并州莽曰監水東南爲藺臯狼及平周境

新通志漢西河郡臨水縣蓋因縣東湫水爲名湫水舊稱陵水

古本名臨水也汾州志云西河郡有臨水縣或以爲即臨縣然

水經注與唐宋書絕不涉及汾陽縣志云以西河名郡始於漢

武帝元朔四年郡治本在河西平定縣

徐松龕今地攷畧漢西河郡治富昌後漢治平

定均在今河套內鄂爾多斯左翼前旗其西南跨河得藺臨水臯狼離石隰成土

軍中陽平周今臨縣永寧寧鄉石樓諸州縣是也史記武帝元

朔三年同時封代共王子劉熹爲蘭侯遷爲臯狼侯賢爲臨河侯新通志臨河疑即臨水今臨縣所由得名又按漢表代共王子九人封國皆在西河其地旣確爲河以東縣矣石樓亦有臨河未嘗不可援爲漢侯國之證戴氏以前史不著並臨水俱從闕疑是其精審處又考漢朔方郡實有臨河縣當時推恩分封所至終以西河郡臨水爲近是

謹案蘭臯狼以地勢推之同在今縣境之東南臨水當在境內腹地戴氏謂水經注與唐宋書絕不涉及遂謂孤注難憑竊謂班氏以漢人志漢地豈能無徵水經之陵水即今縣之湫水陵臨音近古今異讀新莽改曰監水當時篆隸互用臨監文近而又古讀同韻或即臨水之誤新莽改革紛更異名

歧出後世往往不知其詳如園陰之園以園水得名本作園亦屬西河郡莽改曰方陰足徵其好事更易不求甚解姑並錄以存疑

汾州志平周考方輿紀要平周城在介休西四十里考之史記魏世家襄王十三年當秦惠文王改元之十三年秦取我曲沃及平周漢書地理志平周縣隸西河郡關駟十三州志云古平周縣在介休縣西五十里蓋北魏時其地屬介休今介休縣西二十里即與靈石縣接境其地割屬靈石

新通志平周考按今介休西二十里即爲孝義縣地如關駟言即當在今孝義縣南然決非西漢故縣者此本爲茲氏南境屬太原郡其西河郡治平定在今河套東漢永和五年始南徙五

百九里治離石所統三十六縣併省過半當時必有與郡同徙者如隰成中陽皆先濱河後乃移置太原郡境薛尚功鐘鼎款識有漢平周鉏所記縣名有平周平定園陰三縣其文云平周授園陰園陰在今陝西葭州園陰故城在米脂縣去孝義三百餘里如當時平周已治此豈能於三百里外作器相授乎近人著漢志釋略注爲臨縣西地當是時平周園陰均處河濱彼此相望通工易事習以爲常觀後來宋置晉寧軍猶治河西之葭蘆砦正與漢跨河爲郡之治相仿是其地明明在臨縣而不據以列入者漢表注平周在湖陽爲今河南之唐縣未嘗不可以二字名地故不敢決爲必在山西也又功臣表有平州侯王陝以武州作武周例之州周二字古恒通用平州亦即平周也而注引地道

記縣屬巴郡愈當從畧

謹案平周之說當以通志爲是若據汾志則在今靈石界內漢茲氏縣地也茲氏屬太原郡平周屬西河郡十郡考畧云漢西河郡跨黃河兩岸在內地黃河東岸者爲山西汾州府屬之臨縣永寧州寧鄉石樓四縣均在西山中若據汾志以平周在介休西南靈石境內中隔孝義縣地與西山四縣不相連屬況後漢省併西河三十六縣爲十三縣其在河東之離石蘭泉狼隰成四縣均在今離石境內其時縣境中臨水旣省平周或仍其舊更有證者縣境西南有寨則山相傳爲古大同鎮與招賢山之鐵冶相距三十餘里平周鉏或即出此與漢志釋畧注平周爲臨縣西地適合特水經注與元和

志無指實之文遂茫無可據耳

後漢永和五年九月以匈奴寇掠西河郡南徙五百九里治離石
領十三城藺臬狼平周在省臨水

後漢書順帝紀永和五年九月丁亥徙西河郡治離石東觀記

西河郡治平定縣

在今河套鄂爾多斯左翼前旗境

離石在郡南五百九里永

和五年以匈奴寇掠徙郡離石案永和五年上距元朔四年凡
二百六十五年後漢書郡國志并州刺史部太原郡西河郡西
河領十三城有離石藺臬狼土軍隰城中陽平周而無臨水從
併省也

魏仍隸河西郡而治茲氏縣境轄於離石

未置縣

新通志沿革圖解水經注魏黃初二年分太原後置西河郡

治

陽乃漢
茲氏地

又載晉西河繆王司馬子政碑云西河舊處山林漢末

移攘百姓失所魏興更闢疆宇分割太原四縣以爲邦邑其郡

側山帶塞云云又載離石令宗羣等二百三十四人據此則離

爲西河屬縣臨水省入離石其境則統名離石矣

晉仍魏制永興初匈奴左部帥劉淵據離石稱漢

在今離
石之間

寇太原

中都尋遷蒲子置幽州刺史鎮離石其後地入石勒而符健慕容

儁符堅慕容垂迭有其地石勒改爲永石郡蘭泉狼隸焉慕容儁

又改永石郡爲西河郡

汾州志晉書地理志永興元年劉元海僭號於平陽稱漢於是

并州之地皆爲元海所有元海乃以幽州刺史鎮離石今案劉

淵始稱大單于在離石尋稱漢王據離石之左國城皆永興元

年事其僭號平陽乃永興二年事凡五年間名號三易志約略其詞繫之永興元年疏矣時并州刺史劉琨據守晉陽永嘉六年淵寇晉陽琨保於陽曲劉曜置并州於蒲阪而石勒始有晉并州地志言并州皆爲淵所有亦謬永興二年十有二月辛巳詔將軍周觀率衆詣西河離石鎮撫雜部載記大興二年勒僞稱趙王尋討鮮卑鬱弼於離石悉降其衆城地理志自惠懷之間離石縣荒廢勒於其處置永石郡自石勒之後苻氏慕容氏彼此相繼干戈擾攘其互有并州諸郡也苻健值晉永和中慕容儁值晉升平二年苻堅值晉太和五年慕容垂值晉太元中迨北魏皇始元年值晉太元二十年慕容垂卒九月魏軍次陽曲并州牧慕容農棄城夜遁魏軍略地晉州獲慕容買得於平

陶城由是并州入於北魏上距永興元年凡九十年

謹案晉興以來離石以西均爲匈奴攘據朝秦暮楚其不奉正朔實與晉相始終舊縣志今縣南四十里劉王溝有劉王廟相傳元海練兵於此有德於民立廟祀之縣治北四十里紫金山有崇應侯廟即石勒祠相傳石勒當時據山爲壘土人稱爲山石勒後訛爲三石郎徵之史冊證以古蹟縣境爲劉石等割據久無主名所謂永石西河亦隨時更易耳

北魏天興初置離石鎮北齊天保三年置西汾州因改離石爲昌化縣屬懷政郡縣境均在轄地又於縣北境立烏突戍

太平記石州後魏爲離石北齊天保三年於城置西汾州因改離石爲昌化縣屬懷政郡新通志北齊沿革圖說天保三年起

長城自黃櫨嶺起北至社于戍四百餘里立三十六戍四年正月山胡圍離石戍帝親討之未至而逃因巡三堆戍大狩而還北史永熙二年正月丁酉齊獻武王大破爾朱兆於赤嶺嶺衆並降兆竄於窮山殺所乘馬自縊於樹東魏武定三年齊獻武王出軍襲雜部分爲二道以大司馬石城郡公斛律金爲南道軍師由黃櫨出獻武王自出北道度赤嶺嶺會金於烏突戍合擊破之其前歡蹙爾朱兆妻子亦於烏突戍審其地勢當在臨泉故縣閒矣

謹案縣治北三十五里黑峪場村北湫水之東山上有故城遺址府縣各志皆未載明建置時代今考後周所置之烏突縣故城在今縣治南三十里湫水之東府底村唐置之臨泉

縣故城在今縣治北五十里湫水之西故縣村惟南距縣治三十五里湫水東之故城東北距赤嶺三十餘里准以地望與北史吻合其爲烏突戍無疑至今土人耕於其地者每掘得有銅箭頭及名印銅鎚鐵炮等物亦當年鎮戍之證據也又按車突切音赤赤黑疊韻谷峪通用今呼黑峪即古之車突谷胡漢譯言音訛僞變其故城爲烏突戍址特舊志未之詳耳

北周改西汾州爲石州於今縣治南三十里置烏突郡烏突縣又析今縣南境隸定胡郡定胡縣析東南境隸窟胡郡窟胡縣

汾州志自魏分爲二齊承東魏周承西魏而周卒平齊其詳無地志可考隋書地理志離石郡下云後齊置西汾州後周改石

州修化縣下云後周置窟胡郡窟胡縣定胡縣下云後周置定胡郡定胡縣太和縣下云後周置烏突郡烏突縣元和志石州平夷縣本漢離石縣地周宣帝割縣西五十一里置定胡縣東至州治九十五里大象元年置烏突郡烏突縣方輿紀要烏突縣蓋以車突谷而名北魏太和十九年吐京胡反汾州刺史元彬擊破於車突谷即此

謹案周平齊後山胡遠竄遂於離石西北分置三郡縣烏突郡烏突縣定胡郡定胡縣窟胡郡窟胡縣是也元和志云太和城在臨縣東北三十五里後周烏突郡烏突縣治焉是誤以烏突成爲烏突縣矣若太和果在縣東北三十五里與唐遷置之臨泉一河之隔南北相距不過十數里改之可也何